

Cultura tin un luga importante den nos educacion

Schoolnan a celebra "San Juan" den grandi



ORANJESTAD (AAN): "E tabata un presentacion fantastico! Hopi contento pa mira con cultura ta biba den nos muchanan", asina Minister Michelle Hooyboer-Winklaar di Asuntonan Economico, Asuntonan Social y Cultura a bisa despues di a mira e presentacion na Sint Anna School na Noord.

Algun siman pasa e mandatario a bishita e school caba, ora cu a entrega un caha di informacion, material pa les y tur sorto di guia pa celebracion di "Dia di San Juan". Tur school a haya e mesun caha aki yena cu informacion, cu sin duda lo alcanza na mas o menos 20 mil mucha cu ta bay school riba nos isla.

Ta di e forma aki Gobierno, atraves di Departamento di Cultura ta promove e evento aki cerca tur estudiante.

"Mi ta contento di a mira un presentacion completo cu tur e klasnan a haci, na un manera hopi creativo cu a inclui baile, canto, versjenan y asina por sigui menciona. Den un solo palabra, e tabata fantastico, hopi bon haci. Aki bo ta wak con hopi involvi e muchanan mes por ta cu nos cultura y cu nos danan special cu ta parti di nos cultura", asina Minister Michelle Hooyboer-Winklaar a duna di conoce.

E mandatario a bisa cu tur school a celebra e dia special aki awe, tur cu e caha di material cu Gobierno a entrega.

